

Te Oraiti a Garry te Pirikoti

Nā John Carr i tuhituhi
Nā Philip Webb ngā pikitia




Te Oraitī a Garry te Pirikoti



Wāhanga 1

He rawe ki a Matua Baxter te eke papawīra mai i tōna pāhoka tū rākau ki raro, ki te tuku i āna uho āporo ki tāna pāmu noke, engari kua rerekē i tēnei rā.

Kāore ia i tau ki tāna hōpua tauranga, engari i taka kē ia ki te rōhi taratara e takoto tītaha ana ki te wai. I tikoki ia i tētahi ipu putiputi kua pakaru e takoto ana ki te rōnaki. Kua tītaha hoki tāna pāmu noke. E tū tonu ana te whito tū kāri, engari kua muia katoatia e te noke paruparu.





He kāroti kua ngaua e takoto ana ki tōna ara hīkoi, he puare hoki i tōna moenga whakawerewere. He nui kē atu te puare i te taiapa rākau. Mā tēnei puare, ka kite a Matua Baxter i te wahine e noho tata ana ki a ia, ko Whaea Quirk.

Kāore a Whaea Quirk i te āhua koa. He āputa i tōna kāri, he kāroti i reira i mua me tōna rōhi hoki i tino pai ki a ia. Tērā hoki ngā ngauranga niho rerekē i ōna kamupūtu, he paru i tōna papatakahi, ā, ko ētahi haupū māpere pango i tōna ara hīkoi.

Ka hiki ake a Whaea Quirk i tētahi, ka tirotiro.

“He matā!” ka hāparangi ia ki a Matua Baxter.
“Kua kōkiritia tātau e te manene riri o tuarangi.
Kia tere! Waeahia te Pirimia!”





Ka titiro a Matua Baxter ki te matā i te ringa o Whaea Quirk, ka menemene. “Ehara i te manene riri ki taku titiro,” hei tāna, “engari kē he nanenane hiakai.”

Kātahi ia ka rongo i te kāho e taka ana ki te whenua mai i tōna raina whakamaroke kākahu, me te tangi mai o tētahi “maaaaa!”

Ka huri ia, ka kite i tētahi pirikoti e iri ana i te raina kākahu e tata ana ki tōna tarau roto kua karukaru nei te āhua ināiane.


“Me waea kē tāua ki te SPCA – me tere hoki!”

Wāhanga 2

I tīmata te rā o Garry te pirikoti ki ngā āhuatanga o ia rā, arā i te heria ia ki tētahi taiapa i te taha o tētahi huarahi tuawhenua. Kua tū ia ki konā mō te wā katoa i mahara ai ia, ā, kāore ia i pai ki tērā wāhi. Ko tāna mahi, he kai i te pātītī roa, puehu hoki i waenga i te taiapa me te huarahi.

Kāore a Garry i pai ki te kara e whakamamae nei i tōna kakī; kāore ia i pai ki te mamae i ōna waewae nā ōna matihao kua tino roa; kāore ia i pai ki te mekameka; kāore hoki ia i pai kia mokemoke ki tōna kotahi.

Kāore a Garry i pai ki te kohu mākū o te ata, ki te hoihoi rānei o te motokā papatahi e tere ana te haere.



I rongo a Garry i ngā wīra o te motokā papatahi e pāheke ana i te kirikiri i mua i tōna kitenga atu. Ka peke atu ia, ka tūtuki mai te motokā papatahi ki tōna whare, ka wāhi i te taiapa, kātahi ka tū ki te pātiki. Ka whakamahuru mai a Garry i te ohorere, ka mōhio kua kore e heria tōna mekameka ki te taiapa.

Mea rawa ake, kua pai haere tōna rā. Ka titiro te kaitaraiwa ki ngā pākarukaru o tōna motokā papatahi, ka tō a Garry i tōna mekameka ki roto i te kohu, ka oraiti. E matakū ana ia, engari, e hīamo ana hoki.

Kua wātea a Garry – e wātea ana ki tāna i pai ai, ā, koia hoki tāna i mahi ai.




Wāhanga 3

Ka hiki te kohu, ka kite a Garry kua tae ia ki tētahi wāhi hou kāore i kitea i mua, ā, he nui ngā mahi ngahau mō te pirikoti. Ka takahi ia i te kāri, ka ngaungau kāroti, ka kanikani ki te papatakahi, ka ngau i te kamupūtu, ka hauhake i tētahi rōhi, ka tūtuki i te taiapa ki tōna upoko kia puare mai ai, ka whakahoro i tētahi pāmu noke, ka ngau hoki i te moenga whakawerewere.

Kātahi a Garry ka mahi i tētahi mahi e tino pai ana ki ngā nanenane katoa, engari kāore ia i āhei i mua, ko te piki! Tuatahi, ka piki ia i tētahi poro rākau, kātahi ka piki i te haupū pereki, nā ka piki i te kāho i tana kitenga atu i tētahi mea reka hei kai. Ka tū ia ki ngā waewae e rua, ka whakamātautau ki te tauteka i a ia anō ki tētahi waea whīroki mā ōna matihao o mua.

Kātahi ka hē ngā rā. Ka hinga te kāho, ka taka whakamuri a Garry me tōna mahara ka horo ia ki te whenua, engari tē hinga.

Kua mau a Garry, e tautau ana ngā waewae, e iri ana i te hau, e tangi ana i te matakū.




Wāhanga 4

He nui tonu ngā kararehe i whakaoratia e Matua Weston mō te SPCA, engari kāore anō ia i whakaora i tētahi nanenane e iri ana i te raina kākahu mā ōna hāona. I te māharahara te āhua o Matua Baxter me Whaea Quirk. I mōhio anō a Matua Weston, nā ngā matā pango e takoto ana ki te whenua, i te māharahara hoki te nanenane.

Ka whakamahia tētahi tauaru, tētahi whāriki moenga me ētahi kutikuti waea, kātahi a Matua Weston rāua ko Matua Baxter ka wete i a Garry i te raina kākahu.

I te pōrearea tonu a Garry i tōna tūnga ora anō ki te whenua, ā, ka mārō te pupuri a Whaea Quirk i tōna kara kia kore ai ia e oma atu.




“Kei te pai,” hei tāna ki a Garry. “Kua whakahekea mai koe i te raina kākahu, kāore nei he mate”.

“Kāore i te pērā tōku tarau roto,” ka amuamu a Matua Baxter.

Ko te āhua nei, nā ētahi o ngā kāroti a Whaea Quirk kua keria ake i tau anō te mauri o Garry. Kātahi ia ka heria ki te kūaha o muri o te wākena o Matua Weston.

I te taraiwatanga atu o te wākena o Matua Weston me te ngāwari o āna kōrero, ka mōhio a Garry ka pai haere te wāhi ki a ia.




Wāhanga 5

I tika tā Garry. I tangohia tōna mekameka, ā, i tirohia ia e te rata kararehe e tino whakahoahoa nei te āhua, nāna i panipani tōna kakī kia māmā ai ngā wāhi mamae. Kātahi ka tapahia atu, ka taitaia atu ngā puehu me ngā paru, me ngā kākano otaota taratara o te huarahi kua rua tau te roa e mau nei ki a ia. Ka horoia, ka tapahia hoki ōna matihao.



I te ata o muri mai, ka tino pai kē atu te wāhi ki a Garry, i tōna nekehanga ki te pātiki nanenane. He pātītī ururua, he wai māori, he haupū kōhatu hoki hei pikitanga, ko ētahi anō nanenane e rua hoki!

Ka hori ētahi rā e tākaro ana a Garry ki ōna hoa hou, ka tūmanako ia kia noho ki te pūtahi SPCA mō ōna rā katoa, ahakoa tōna mōhio ka kore e pērā. Kua kite ia i ngā tāngata e whiriwhiri ana i te kararehe hei hari mā rātau. Hei tētahi rā, ko ia tērā, ko tētahi rānei o ōna hoa hou.



Wāhanga 6

I te rā o muri mai, ka heria mai e Matua Weston ko tētahi tangata ki te pātiki nanenane. Ka titiro tēnei tangata ki ngā nanenane katoa, kātahi ka whakatata mai. Ko Matua Baxter!

I ngā te manawa o Garry. Mōhio tonu ia kāore a Matua Baxter e kōwhiri i a ia nā ngā mahi a Garry i pakaru ai ko tāna taiapa, ko tāna hōpua kaukau, ko tāna pamu noke, ko tāna whito tū kāri, ko te moenga whakawerewere, ko tōna tarau roto hoki.

Heoi, i te pōuri hoki a Garry kei heria e Matua Baxter ko tētahi o ōna hoa.

Nā, ka piki a Garry i te haupū kōhatu, ka mātakitaki i a Matua Weston e āwhina ana ki te whakakuhu i ōna hoa e rua ki te tauaru a Matua Baxter. I te pōuri, i te mokemoke hoki a Garry, kātahi ka kite ia i a Matua Baxter e hoki mai ana ki a ia me te menemene.



I te menemene tonu a Matua Baxter i te whakahekenga mai i a Garry me ērā atu nanenane e rua i te tauaru kia uru ai rātau ki tō rātau pātiki me te taiapa hou. I reira hoki a Whaea Quirk, ka hoatu i ētahi kāroti ki a Matua Baxter mōna i whakatikatika te puare i te taiapa.


“Ākuanei tēnei ka noho ko te pāka pai rawa atu o te ao mō ngā nanenane,” hei tāna ki a ia.

I pērā kē te whakaaro o Garry me ōna hoa e rua. Kua hurihia te pāhoka tū rākau hei haumarua nanenane, ā, ko te ara papawīra hei ara piki. Kua hurihia ngā poro rākau hei wāhi piki, ā, he nui ngā kāho tukituki e takoto ana ki te pātiki.

Ka mātakitaki rātau i a Matua Baxter e tū ana ki tērā taha o te taiapa ki te whakaako i a Whaea Quirk ki te tuku kāroti ki ngā nanenane hiakai mā tana matatopa.

“E tino koa ana ahau he nanenane āku hei hoa māku i tēnei kaupapa,” hei tāna. “Kāore i pēnei rawa te ngahau, mai i taku tamarikitanga.”

I kite a Whaea Quirk i a Garry e titiro whakarunga ana. Te āhua nei, i te tūngoungou te upoko me te whakaae hoki.



Te Tiaki Nanenane

- Me haumarū ngā nanenane i te ua me te makariri, me tata hoki rātau ki te pātītī ururua. Nā konei, me āhei ō rātau whare te neke. Ko tētahi tikanga nui kia pai ai te whare nanenane, tino kore nei ngā nanenane e pai kia mākū.
- Ka kai ngā nanenane i ngā kai maha, arā, he momo pātītī, he rau, he otaota hoki. Kei te rite rātau ki a tātau, arā, me mohou te kai me te wai, me mā hoki. Tērā ētahi otaota e paitini ana ki ngā nanenane, nō reira me ako ko ēhea, me tango atu i ngā tarutaru, otaota, rākau e paitini ana i mua i te heri mai i te pirikoti ki te kāinga.
- Me kaua e here ngā nanenane kei whīwhiwhi, ka whara. Ka hakihaki hoki ngā kakī ina wakuwaku ngā kara.
- He kararehe noho kāhui ngā nanenane. He pai ki a rātau te taki noho ki ngā nanenane, kaua ko te noho taratahi.
- He kararehe māhirahira te nanenane. He rawe ki a rātau te hōpara, arā mā te waha tonu. Me āta whakataiapa, me whai papa piki hoki. He pai ki ngā nanenane kia aroā e te tangata.
- He pai ki ngā nanenane kia whai papa pekepeke, ka taea hoki e rātau te piki rākau.

**Haere ki kids.spcaeducation.org.nz
kia ako tonu i ngā mahi tiaki nanenane**

Te Marautanga o Aotearoa
taumata 3-4
ākonga tau 6-8
1571 kupu

Te Oraiti a Garry te Pirikoti/Garry the Goat's Escape

© 2017 Society for the Prevention of Cruelty to Animals Education, Auckland, New Zealand
Published by Wendy Pye Publishing Limited for SPCA Education
Nā John Carr i tuhituhi /Text by John Carr
Nā Philip Webb ngā pikitia /Illustrations by Philip Webb
This edition published 2019

ISBN: 978-1-98-853676-7

All rights reserved. No part of this publication may be reproduced or transmitted in any form or by any means, electronic or mechanical, including photocopy, recording or any information storage and retrieval system, without permission in writing from the publishers.

Distributed in New Zealand by The SPCA
50 Westney Road, Mangere, Auckland 2022

Printed in China through Colorcraft Ltd, Hong Kong.

10 9 8 7 6 5 4 3 2 1